

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), i člana 19. i 141. Statuta Općine Novo Sarajevo („Službene novine Kantona Sarajevo“ broj: 5/20- prečišćeni tekst i 20/20 -ispravka) Općinsko vijeće Novo Sarajevo na \_\_\_\_\_ sjednici, održanoj dana\_\_\_\_\_, donijelo je

**Prijedlog**

**ODLUKU**

**O USLOVIMA, NAČINU, KRITERIJIMA I IZNOSU SREDSTAVA ZA DODJELU  
JEDNOKRATNE NOVČANE POMOĆI LICIMA I DOMAĆINSTVIMA  
SA PODRUČJA OPĆINE NOVO SARAJEVO**

**I-OSNOVNE ODREDBE**

**Član 1.  
(Predmet)**

Ovom Odlukom utvrđuju se korisnici prava, finansiranje, uslovi, kriteriji i način za ostvarivanje prava, način provođenja, iznosi i dodjela sredstava za jednokratnu novčanu pomoć licima i domaćinstvima sa područja Općine Novo Sarajevo.

**Član 2.  
(Gramatička terminologija)**

Gramatička terminologija korištenja muškog ili ženskog spola podrazumijeva uključivanje oba spola.

**II.KORISNICI PRAVA I FINANSIRANJE**

**Član 3.  
(Korisnici prava)**

- (1) Sredstva se dodjeljuju licima i domaćinstvima koji imaju prebivalište na području Općine Novo Sarajevo najmanje jednu godinu prije podnošenja zahtjeva za jednokratnu pomoć.
- (2) Sredstva se dodjeljuju i licima i domaćinstvima kojima je priznat status raseljenog lica, a imaju boravište na području općine Novo Sarajevo, najmanje jednu godinu prije podnošenja zahtjeva za jednokratnu pomoć.

#### **Član 4. (Finansiranje)**

Sredstva za dodjelu jednokratne novčane pomoći utvrđuju se u Budžetu Općine Novo Sarajevo za svaku kalendarsku godinu. Raspodjela novčanih sredstava za ove namjene vršit će se u skladu sa raspoloživim sredstvima u općinskom budžetu za tekuću godinu.

### **III-USLOVI, KRITERIJI I NAČIN ZA OSTVARIVANJE PRAVA NA JEDNOKRATNU NOVČANU POMOĆ**

#### **Član 5. (Uslovi i kriteriji za ostvarivanje prava za participaciju u liječenju)**

- (1) Za participaciju u liječenju teških oboljenja, ostvaruje se pravo na jednokratnu novčanu pomoć, a prema Listi teških bolesti, odnosno teških tjelesnih povreda temeljem kojih se ostvaruje naknada za slučaj teške invalidnosti ili teške bolesti („Službene novine Federacije BiH“, broj: 30/05). Razmatranje zahtjeva će se vršiti na osnovu preporuke stručnog lica medicinske struke koja treba biti dostavljena uz zahtjev.  
Za navedene namjene lica sa malignim oboljenjima u prvoj godini liječenja mogu ostvariti jednokratnu novčanu pomoć u iznosu od 1.000,00 KM, a narednih pet godina liječenja u iznosu od 500,00 KM. Lica sa težim i hroničnim oboljenjima mogu ostvariti jednokratnu novčanu pomoć u iznosu od 500,00 KM.
- (2) Za participaciju u nabavci lijekova, ortopedskih pomagala i drugih medicinskih aparata, za koje nije predviđena participacija ili je predviđena djelimična participacija od strane Zavoda zdravstvenog osiguranja Kantona Sarajevo, a propisani su od strane nadležne medicinske službe kao terapija ili sredstvo koje će uticati na poboljšanje zdravstvenog stanja lica, uz dokaz o ukupnim troškovima, može se ostvariti pravo u iznosu od 50% cijene, ali ne u iznosu većem od 1.000,00 KM.
- (3) Porodice koje imaju dijete ometeno u fizičkom ili psihičkom razvoju, što se dokazuje pravosnažnim rješenjem donesenim u skladu sa Pravilnikom o utvrđivanju preostale sposobnosti i razvrstavanju djece i omladine ometene u psihofizičkom razvoju („Službene novine Kantona Sarajevo“ broj: 26/08 i 5/12), a do navršenih 27 godina života, mogu ostvariti pravo na jednokratnu novčanu pomoć u iznosu od 400,00 KM.

### **Član 6.**

#### **(Uslovi i kriteriji za ostvarivanje prava za lica i domaćinstvima u stanju socijalne potrebe)**

- (1) Jednokratna novčana pomoć se dodjeljuje licima i domaćinstvima u stanju socijalne potrebe, odnosno licima i domaćinstvima kojima je neophodna pomoć radi savladavanja socijalnih i drugih teškoća i stvaranja uslova za zadovoljavanje osnovnih životnih potreba, a ukoliko se te potrebe ne mogu zadovoljiti u drugim sistemima socijalne zaštite.
- (2) Ukupan prihod domaćinstva kao uslov za ostvarivanje prava čine prihodi svih članova domaćinstva ostvarenih po bilo kom osnovu.
- (3) Lica i domaćinstva koja se nađu u stanju socijalne potrebe, a čiji prihodi po članu zajedničkog domaćinstva ne prelaze iznos 20% prosječne plaće isplaćene u skladu sa važećom Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata, i zaštiti porodica s djecom, mogu ostvariti pravo u iznosu od 100,00 KM za jednog člana domaćinstva, a za svakog narednog člana domaćinstva ovaj iznose će se uvećati za 50,00 KM.
- (4) Lica u stanju socijalne potrebe mogu ostvariti pravo na jednokratnu novčanu pomoć po uslovima iz člana 5. stava 2. Odluke.
- (5) Članovima domaćinstva smatraju se podnositelj zahtjeva i lica koja se nalaze u zajedničkom domaćinstvu sa podnosiocem zahtjeva (dokaz kućna lista ili potvrda mjesne zajednice).
- (6) Za navedene namjene pravo na jednokratnu pomoć ne mogu ostvariti domaćinstva čiji je član poreski obveznik, te vlasnik ili posjednik motornog vozila, osim ako vozilo služi kao ortopedsko pomagalo.

### **Član 7.**

#### **(Način za ostvarivanje prava)**

Zahtjev za jednokratnu novčanu pomoć se predaje Službi za socijalna pitanja, zdravstvo, izbjeglice i raseljena lica na propisanom obrascu, na kojem je navedena dokumentacija koju je potrebno priložiti, a kojom se dokazuje ispunjavanje uslova i kriterija za dodjelu jednokratne novčane pomoći iz članova 5. i 6. Odluke. Ukoliko se iz priložene dokumentacije ne može utvrditi da li podnositelj zahtjeva ispunjava uslove i kriterije, Služba će zahtijevati dostavu dodatne dokumentacije.

### **IV-NAČIN PROVOĐENJA, IZNOSI I DODJELA SREDSTAVA**

### **Član 8.**

#### **(Provođenje)**

- (1) Općinski načelnik imenuje Komisiju za raspored sredstva po Odluci o uslovima, načinu , kriterijima i iznosu sredstava za dodjelu jednokratne novčane pomoći licima i domaćinstvima sa područja Općine Novo Sarajevo, koja razmatra pojedinačne zahtjeve.

- (2) Zahtjeve za dodjelu novčane pomoći Komisija će razmatrati po potrebi, a najmanje jednom mjesечно.
- (3) Na osnovu prijedloga kojeg utvrđuje Komisija, Općinski načelnik donosi Zaključak za isplatu novčanih sredstava za dodjelu jednokratne pomoći. Sredstva se realizuju putem Službe za socijalna pitanja, zdravstvo, izbjeglice i raseljena lica, a za realizaciju Zaključka zadužena je Služba za privredu, budžet i finansije.
- (4) O realizaciji sredstava, po odredbama ove Odluke, Općinski načelnik informiše Općinsko vijeće jednom godišnje.

**Član 9.  
(Iznos i dodjela sredstava)**

- (1) Visina jednokratne novčane pomoći ne može biti manja od 100,00 KM niti veća od 1.000,00 KM, a visinu pomoći pojedinačno predlaže Komisija, u skladu sa članovima 5. i 6. Odluke, u svakom konkretnom slučaju.
- (2) Ukoliko podnositelj zahtjeva ispunjava uslove po više osnova, može ostvariti jednokratnu novčanu pomoć po svim osnovama, ali ne u iznosu većem od 1.000,00 KM.
- (3) U izuzetnim slučajevima, kada Komisija ocijeni da je neophodno, uz dokumentovana obrazloženja može predložiti Općinskom načelniku dodjelu većeg iznosa novčane pomoći od visine utvrđene stavu 1. ovog člana.

**Član 10.  
(Ograničenja)**

- (1) Novčana pomoć licima i domaćinstvima na osnovu ove Odluke može se dodijeliti samo jednom u toku kalendarske godine.
- (2) Pravo na jednokratnu pomoć ne mogu ostvariti lica koja su jednokratnu pomoć ostvarila putem Službe za boračko – invalidsku zaštitu Općine Novo Sarajevo.

## **V-PRELAZNE I ZAVRŠNE ODREDBE**

### **Član 11. (Prestanak važenja)**

Stupanjem na snagu ove Odluke prestaje da važi Odluka o uslovima, načinu, kriterijima i iznosu sredstava za dodjelu jednokratne novčane pomoći licima i domaćinstvima sa područja Općine Novo Sarajevo („Službene novine Kantona Sarajevo“ broj: 13/15, 15/18).

### **Član 12. (Stupanje na snagu)**

Odluka stupa na snagu osmog dana od dana objavljivanja u „Službenim novinama Kantona Sarajevo“.

Broj:

Sarajevo, \_\_\_\_\_.\_\_\_\_.2021.godine

**Predsjedavajući Općinskog vijeća**

**Novo Sarajevo**

**Robert Pleše**

## O b r a z l o ž e n j e

### I - PRAVNI OSNOV

Pravni osnov za donošenje ove Odluke sadržan je u: članu 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), kojim je definisana uloga općinskog vijeća kao organa odlučivanja u jedinici lokalne samouprave, općini, te članu 19. i 141. Statuta Općine Novo Sarajevo („Službene novine Kantona Sarajevo“ broj: 5/20-prečišćeni tekst i 20/20 -ispravka) kojim je regulisana nadležnost Općinskog vijeća Novo Sarajevo i pravo donošenja propisa.

### II - RAZLOZI ZA DONOŠENJE

Općinsko vijeće Općine Novo Sarajevo je na svojoj 27. sjednici održanoj dana 30.03.2015. godine, donijelo Odluku o uslovima, načinu, kriterijima i iznosu sredstava za dodjelu jednokratne novčane pomoći licima i domaćinstvima sa područja Općine Novo Sarajevo („Službene novine Kantona Sarajevo“ broj: 13/15, 15/18).

Na osnovu njene primjene, ukazala se potreba za donošenjem nove Odluke kojom će se jasnije definisati kriteriji za ostvarivanje prava na jednokratnu novčanu pomoć za participaciju u liječenju, te udovoljiti većem broju zahtjeva lica i domaćinstva koja se nalaze u stanju socijalne potrebe.

Odlukom se za participaciju u liječenju traži preporuka stručnog lica medicinske struke o kojem se oboljenju radi i u kojem je stadiju, a radi lakšeg utvrđivanja prava na jednokratnu novčanu pomoć.

Odlukom je predviđeno da pravo na jednokratnu novčanu pomoć imaju lica i domaćinstava koja su u stanju socijalne potrebe, a čiji prihodi po članu zajedničkog domaćinstva ne prelaze iznos od 20% prosječne plaće.

Odlukom je preciznije definisano da porodice koje imaju dijete ometeno u fizičkom ili psihičkom razvoju, što se dokazuje pravosnažnim rješenjem donešenim u skladu sa Pravilnikom o utvrđivanju preostale sposobnosti i razvrstavanju djece i omladine ometene u psihofizičkom razvoju („Službene novine Kantona Sarajevo“ broj: 26/08 i 5/12), a do navršenih 27 godina života, mogu ostvariti pravo na jednokratnu novčanu pomoć.

Imajući u vidu činjenicu da je pandemija COVID-19 uzrokovala osim zdravstvenih i socijalne posljedice zbog koji je određeni broj lica i domaćinstva ostao bez stalnih primanja ili su im ista umanjena, donošenje ove Odluke smatramo neophodnim i opravdanim.

### III-FINANSIJSKA SREDSTVA

Za realizaciju ove Odluke planiraju se sredstva u Budžetu Općine Novo Sarajevo za svaku kalendarsku godinu. Raspodjela novčanih sredstava za ove namjene vršit će se u skladu sa raspoloživim sredstvima u općinskom budžetu za tekuću godinu.

**OPĆINSKI NAČELNIK**

**Dr. Hasan Tanović**